

**Isytihar Harta Kepada SPRM, Tidak Timbul Isu Keselamatan  
Bernama  
27 Februari , 2012**

PUTRAJAYA, 27 Feb (Bernama) -- Ketua Pesuruhjaya Suruhanjaya Pencegahan Rasuah Malaysia (SPRM) Datuk Seri Abu Kassim Mohamad berkata tidak timbul isu keselamatan jika suruhanjaya itu diberi kebenaran untuk mengakses dokumen pengisytiharan harta anggota pentadbiran Persekutuan termasuk anggota Kabinet.

Katanya yang menjadi perhatian SPRM bukan jumlah aset yang ada sebelum mereka menjadi menteri atau timbalan menteri, paling penting ialah ada atau tidak perkembangan pertambahan yang mendadak.

"Kita (SPRM) akur dengan apa yang dilaporkan tetapi yang menjadi perhatian SPRM iaitu sama ada semasa mereka memegang jawatan dalam kerajaan terdapat pertambahan yang besar atau tidak," katanya kepada pemberita di sini Isnin.

Abu Kassim berkata demikian sebagai menjawab soalan wartawan mengenai pandangan sesetengah pihak sekiranya dokumen pengisytiharan harta itu diberikan kepada SPRM, ia boleh mengancam keselamatan.

Perdana Menteri Datuk Seri Najib Tun Razak semasa merasmikan Program Pegawai Integriti Bertauliah hari ini mengumumkan kerajaan bersetuju dengan cadangan Lembaga Penasihat Pencegahan Rasuah supaya Ketua Pesuruhjaya SPRM mempunyai akses penuh kepada dokumen-dokumen pengisytiharan harta mana-mana anggota pentadbiran.

---BERNAMA

Hakcipta © 2012 BERNAMA

Source: <http://www.bernama.com/bernama/v6/bm/newsindex.php?id=648397>